

北京圖書館 編

北京圖書館藏珍本
年譜叢刊

第 165 冊

北京圖書館出版社

□ 北京圖書館 編

北京圖書館藏珍本
年譜叢刊

北京圖書館出版社

第 165 冊

第一六五冊目錄

開封府君年譜	一
曲園自述詩	一一九
知非錄	二〇七
桐溪達叟自編年譜	二七三
顧齋簡譜	四七一
裴光祿年譜	四九三

開封府君年譜卷上

男孟平謹輯錄

道光元年辛巳 先君生於四月二十七日午時 大先伯嘗

言一夕 先大母夢中見絳衣人下墜自平塘北埂導一官

服白鬚髮老者由塘東北端步入廳堂忽不見越三日而

先君生 先君於兄弟姊妹七人中最幼 大先伯長 先

君十六年故 先君少時事 大先伯知之甚詳

道光二年壬午 先君年二歲春間出痘極重醫云無救時有

一王戲子善符術 二先伯請用符咒乃漸愈而痘毒入目
自是遂患眼漏

道光三年癸未 先君年三歲

道光四年甲申 先君年四歲聞 大先伯言 先君四歲便

舉步有常似能解事

道光五年乙酉 先君年五歲時里中於農隙演戲酬神 先

伯祖負 先君往觀之晚歸家人問竟日所看 先君言之

歷歷如繪 先伯祖甚異之謂 先大父曰決以讀書勿使

種田蓋家世力農諸 先伯均止讀四書詩經便習穡事

先伯祖知 先君有宿慧愛之過於諸伯是年病終時指

先君曰是光大吾家者勿忘予言 先君後在通州與 大

先伯偶及 先伯祖之言猶爲流涕

道光六年丙戌 先君年六歲 三先伯一日散學歸家與

先祖說舜往於田號泣於旻天 先君從旁問曰舜父母俱

存何故號泣 三先伯曰舜之兄弟不和其父母不喜歡他

故號泣 先君曰此必是其弟不好 三先伯曰爾何以知

其弟不好 先君曰舜在田中號泣想是受弟之欺不過故
知是其弟不好 先祖乃益奇之

道光七年丁亥 先君年七歲是年 先君常隨 四先伯牧

牛先君喜荷蓑笠 四先伯曰今日天晴何以着雨具

先君對以 先祖之言曰宜未雨而綢繆又好以常語連作
歌唱人聽之皆成文理

道光八年戊子 先君年八歲是年 四先伯復讀書每日

先君一人牧牛 先祖曰人不可不知稼穡艱難故於東作

方興教

先君以播種耕耨凡田間芟薅茶蓼錢鏹銍艾之

役靡不親嘗

先君於

不孝

兄弟成立後嘗舉

先祖昔日

重農務本之意諄諄誥誥冀子孫皆知遵奉祖訓

道光九年己丑

先君年九歲始入蒙塾從吳繼賢先生是年

讀四書詩經畢七月講論語同學有作破題者先君亦學

作破題一日作八佾舞於庭題云大夫舞天子之佾天子將

無舞矣吳先生大喜謂初作破題便能從空立論將來不特

文字過人志氣亦迥不猶人遂大異視之

道光十年庚寅 先君年十歲讀書經易經畢每月講論語數
次間作破題亦間學詩詠雁字云人字排天上長空送遠聲
時有游學者見而怪之謂吳先生曰是聰明過人慎勿悞之

道光十一年辛卯 先君年十一歲讀禮記畢吳先生時課蒙
童二十餘人命 先君爲之分課儼然學長

道光十二年壬辰 先君年十二歲仍從吳先生 先君是年
讀左傳畢嘗於無事時作四字經授同學生讀有卜者見內
有睦宗信友愛兄體親處爲佳士出爲良臣四語驚曰此誠

奇童後必顯達

道光十三年癸巳

先君年十三歲吳先生以先君英氣卓

越自謂學不足以成之力勸先祖另擇名師時里中遠近

無秀才且吳先生長者仍命先君執贄門下是年專作學

長並未讀書光緒乙酉先君三守江甯留昔日老友洪

明泉先生居署內洪先生每見先君改容起敬私謂

不孝

曰余畏尊公不自今日始五十年前在吳先生館中已如是

現同學諸人皆故獨尊公與余存又待余厚尊公雖視余爲

友余則視尊公猶師也並言 先君從吳先生時年少於諸

同學然當吳先生有事外出 先君肅然端坐呵斥一聲諸

同學皆俯首聽教懍懍不敢干犯僉曰怕學長甚於怕先生

道光十四年甲午 先君年十四歲是年李濟川先生入縣學

先祖命 先君從之李先生所授徒十六七人功課極寬

春間始講學庸作小講十月成篇

道光十五年乙未 先君年十五歲從李先生按課作文李先

生多驚訝之常對人曰某奇悟過人文筆清健定爲出羣之

彥且性情慈愛舉動端方此時議論識見已能勝人將來不
獨學業有成事業亦可觀

道光十六年丙申 先君年十六歲出應縣試列前茅仍從李
濟川先生

道光十七年丁酉 先君年十七歲是年 先君從李先生問
難質疑李先生見 先君學業大進同學作文者多命 先
君改正

道光十八年戊戌 先君年十八歲九月 先祖贈通奉大夫

諱期漢公病終 先君痛不自勝呼號無虛日惟李濟川先生往勸之始稍息同族有桀驁不順其親者見 先君居喪之戚爲之改悔

道光十九年己亥 先君年十九歲 先君是年與諸伯常在先祖靈前坐臥或追述 先祖樂善好施事爲之放聲大哭親鄰聞之皆感泣

道光二十年庚子 先君年二十歲守制讀禮有志正學時文詩賦小楷之餘力求儒先書苦里中僻陋僅得陸宣公集顧

亭林先生日知錄此外無從覓購亦無藏書家可以借讀此時先君名譽已噪有延請教讀者先君却之

道光二十一年辛丑先君年二十一歲諸先伯以食指浩繁遂各分居先君僅得田五畝戚友中頗以先君豪邁多大志不事生產爲慮先君終日讀書談笑自若不自知其貧也

道光二十二年壬寅先君年二十二歲二月家母來歸

家母姓汪氏外祖仿修公早逝舅氏里仁素重先君文

行故 家母得歸於 先君也 先君勵學益力五月遂以
攻苦致疾雖病篤不省人事時意念間猶每日默作文論無
間

道光二十三年癸卯 先君年二十三歲三月 先祖母贈夫
人楊太夫人病終 先君一慟幾絕人謂 先君哀毀過甚
先君曰吾父歿後家道漸落吾兄弟各爨吾母無日不悲
傷到一處流淚一處傷哉貧也無以爲養古人甘旨承歡吾
難望於生前是以悲耳從此 先君於生日皆茹荼蔬忽忽

不樂後逢六十七壽戚友有謀稱觴者 先君嚴止之曰
必爲吾壽轉觸吾悲故終 先君之世逢誕期雖家人不准
行慶祝禮是年里中荒歉春間米貴如珠大先姊生

道光二十四年甲辰 先君年二十四歲售受分田五畝日食
仍不給則以 家母嫁衣當質繼之而於家祭及 先祖母
生日週年皆豫籌措無缺禮

道光二十五年乙巳 先君年二十五歲春間 先君應潛山
徐仲祥姨丈聘開館教讀歲俸不過二十緡日食仍不給

先君泊如也時親戚中有因爭置房產從堂兄弟參商釁屢
不息幾釀大變先君喻之以情折之以理使其說各無所
逞乃皆感悔復歸和好至今某後裔猶稱微先君幾無以
保家

道光二十六年丙午先君年二十六歲應明秀族叔之聘在
桐城南山崗宗會堂祠授讀先君初至見祠宇卑陋心隱
傷之默禱於祖宗之前願他日稍有表見獨任捐修後同
治壬申通州受代回甯即籌款造修竭數年之力始成一先